



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 8

Hungary PM Orban-i China Tir Xi den ajurutep

Paris Olympics nung Gagan Narang Chef de Mission asütsü

VOL. XXI ISSUE NO. 268 (ADOK 268) DIMAPUR RASEMNÜ (WEDNESDAY) CHITENI (JULY) 10, 2024 ₹ 5.00

Putin-i Modi nem Civilian Award tematiba agütsü



Moscow, July 9, 2024 (Agencies): Mongulbarnü Russia President Vladimir Putin-i Prime Minister Narendra Modi nem 'Order of St Andrew the Apostle' award agütsüo. PM Modi-i linük ana tsüngda tesentaktep tajungba yanglushiba atema iba sempet agütsü. St. Andrew Hall, Kremlin nung sentong balaka ayongzuka agidang Putin-i Prime Minister Modi nem iba sempet

agüja liasü. 2019 küm PM Modi nem iba sempet agütsüba sangdonga liasü. India nunger rongnung PM Modi-i mezüng 'Order of St Andrew the Apostle' award angur. 1698 nung Tsar Peter the Great-i Saint Andrew nem tetushi agüja iba sempet agütsüba tenzüka liasü. Saint Andrew ya Yisu indang mezüng apostle aser Russia indang patron saint liasü.

Minister K.G. Kenye-i power generation atema jembii

Kohima, July 9, 2024 (TYO): Nagaland nung 1000MW power adoktsü lenmang lir anungji iba asoshi temulung agütsütsüla ta Power and Parliamentary Affairs Minister for K. G. Kenye-i ashi. State sorkari merangka tang tashi hydro project tasen ka dang yanglutsü lemzüka mali. Union Minister dang Nagaland 500MW projects inyaktü atema aiben mepishio go ta pai ashi. Guwahati nung North-Eastern States & Sikkim nungi Power Ministers mungdang nung Kenye-i iba onük jembii. Iba mungdang ya Union Minister of Power, Housing & Urban Affairs, Manohar Lal lenisüba kübok agia liasü. Minister Kenye-isa Union Minister of Power dang NE States nem Central Sponsored Schemes mapa inyaktang

talamba kar salatsütsü mepishi. Nagaland-i mapang talangka nungi NERPSIP CBIS kübok Lineman Training Centre building yanglutsü atema asüngdanga arur ta Kenye-i tanüa nenshia ashidang Union Minister of Power-i inyaktü mulunga agizük. "Iba senden nung North-Eastern State tem nung tang teinyakdak schemes meyipa repringshi aser generation, transmission, distribution & power sector reforms onüktem lemsatpe" ta Chief Engineer (D&R) & HoD, Department of Power Wabangmeren Jamir-i ashi. Secretary (Power) Asangla Imti, Chief Engineer (D&R) Wabangmeren Jamir aser Chief Engineer (T&G) Kasho Chishi nungeri Minister Kenye meina ao.

Star College Project atema PCC (Autonomous) shim

Dimapur, July 9, 2024 (TYO): India sorkari tenzüka Star College Project atema Patkai Christian College (Autonomous) shimogo aser iba ya Nagaland nung mezüngbuba lir. Ministry of Science and Technology, GoI kübok Department of Biotechnology (DBT) ajanga "Strengthening Component of Star College Program" atema Patkai Christian College shimogo. DBT-i "Star College Scheme for Strengthening of Science Education and Training at Undergraduate Level" ta ser scheme ka tenzüka lir. Iba sempet ya küm asem tashi atema asütsü aser Undergraduate Level Science Laboratory nung

infrastructure tashi itdaksütsü. Iba mapa atema Project Coordinator ji Assistant Professor PCC (Autonomous) Dr. Kensibo Pamai lir. Maneni Dr. T. Moaienla Ao (Chemistry), Panchanan Thakur (Physics), Dr. Zevelou Rhetso (Botany) nunger Departmental Convenors lir. "Iba award nung senotsü aika dena lir aser Science Departments nung laboratory facilities tajungba akümtsü. PCC nung academic session 2024-25 nungi National Education Policy 2020 (NEP 2020) tenzüksüba lir aser mapang shitak ka nung iba sempet anguba atema pelar" ta PCC (Autonomous) Principal Dr. Thepfüvilie Pierü-i ashi.

NSF-i ILP aser Grade-III employment atema CM dangi shidi zülü

Kohima, July 9, 2024 (TYO): Naga Students' Federation (NSF)-i Mongulbarnü Chief Minister Neiphiu Rio den ajurutepa parnok taginüba onüktem züluba shidi ka agütsüo. NSF-i CM Rio dang Dimapur district ya ILP kübok aiddaksütsü aser ozüng alema Grade-III employees shimokba anentsü metetdaksüo. "ILP (inner line permit) bentshütsü tenzüker küm 150 arur aser Nagaland nung iba ajanga tourist aser ozüng alema arurtem azüokteta arur. Ajisüaka tesüiba kümtem state sorkartemi ILP nendaka meinyakba ajanga ozüng alema arurtem Naga nunger maitsü, sobaliba aser litsü asoshi lendong bentsür aruogo" ta NSF-i shidi nung shia lir. "ILP kübok Dimapur district (tesüiba nung) medendaksüba

ajanga ozüng alema arurtem aika jenoka lir. Dimapur nung maitsü tejangja malirtemi süngogo aser iba ajanga Nagaland atema dang masü saka North Eastern hills atema lendong bentsür arutsü ana nung lir" ta parnokisa ashi. Chief Minister-i June 2, 2023 nü ILP suspension order meyipa agitsü aser ILP kübok Dimapur district dendaksütsü ayongzükur ta NSF-isa ashi. Parnokisa Dimapur Railway Station, Dimapur Airport aser entry/exit points ajak nung ILP Monitoring Cells lapoktsü mepishio go. State sorkari Grade-III posts nung nübo shimoktsü atema Nagaland Staff Selection Board (NSSB) tentetba atema tenüngsang agütsür. Iba inyakim ajanga sorkari mapa nung nisung shimokba maparen timi aser shitak inyaktü bendanga agütsüba

sayur aser temsüa aliba nübotem shimoktsü, ta NSF-i CM Rio dang ashi. Ajisüaka, iba mapa tajung tenzüka sorkar departments balala nung backdoor appointments inyaker. Anungji Chief Minister-i item backdoor appointments agientsü atema lemtet tajung ka agitsü ayongzükur" ta parnokisa ashi. NSF-i RTI campaign ka inyakba ajanga backdoor appointments maneni inyakba putetogo, ta parnokisa shisem. CM Rio lenisüba kübok Nagaland nung lanurtem taginübatem atongtsü aser sorkar mapa nung tajungertem aser temsüa alirtem ang shimoktsü imlar ta NSF-isa metetdaksü. Iba shidi nung NSF president Medovi Rhi aser general secretary Chumben Khuvung nati sign süa lir.

Golaghat nung NSCN den yariteper tetsür ka apu

Guwahati, July 9, 2024 (Agencies): Assam kübok Golaghat nung police-i National Socialist Council of Nagaland (NSCN) den tesentaktep aliba atema tetsür ka puogo.

Kamalrani Dhaka-i telungpur telok den tesentaktep lia ama temulung melemi bilemba atema police-i la apu. Golaghat district kübok Merapani nung la apu. Dhaka-i NSCN den yaritepa

shishilembar Pawan Khaliya indang dumper trucks ana sota ayu. Iba osang nung ajemdaker police-i Hombar aonung mita aodang Kamalrani Dhaka dang asüngdangya asütsü atema apu.

Longsa yimdeni MP S. Supongmeren Jamir tushia chuba ak sütsü



Sobaliba ken tena yimdong süa ki maka senzüdang tangokba noksa angur.

Longsa yim, 9th July (TYO): Longsa Village Council-i Lok Sabha MP, S. Supongmeren Jamir nem "Chuba Aksü" sentong Longsa yim dak ayongzuka kanga meraketa tushio go. Wb. S. Supongmeren Jamiri iba sentong nung jembidang, pa nem Longsa yimdeni maongka aser yimli tulu agüja ak sütsüba asoshi pelaba mezüngbuba metetdaksü. Tanü pa Nagaland nungi Lok Sabha MP ka akümba ya yimertem, Ao kin, Naga nunger aser tamanger ajaki sarasademtsüba ajanga Tsüngremer sayatenya atalokba lir, anungji, amangbapur aser nübur ajak dang pelaba pai lemsatpe liasü. "Tsüngrem akümtsüba kü maparen aser mangdang

ataloktsü asoshi merangtsü, anungji, nüburtemi kü nem shisatsü agüjang aser maneni ni atema sarasademjang aser lenla ajak nung ni nungita yaridaksünür", ta pai temepishiba olen ka metetdaksü. Yimdeni temaotsü agiba aser yimdeni temoatsü agütsüba nung maongka jenti sentaka lir. Aji oda, Longsa yimdeni pa nem yimli tulu agütsüba asoshi pelaba lemsatpe. Paise taoba Longsa nungi lenir - asür Takomeren, asür Imtimeren, asür N.I Jamir, R. Lepden, Merentoshi R Jamir, Metsübo Jamir parnok ajak nem tenüngsang aser akümtsüba agütsü, parnoki len pipoka jenjang yanglua yutsüba yong tanü pai iba temoatsü agir, ta ashi. Iba den Longsa lima

tamangtir/Tsüngrem tenzüker ajak nem tenüngsang agütsü aser ano maneni Longsa lima, Aor aser Naga nunger arok asoshi tamang nüktzü akangba ka paisa tayongzükba agütsü. Longsa village council chairman - Talichuba Tatar, council secretary - Opanglemba GB, NPCC working president - Khriedi Theünuo, Dept of Law & Justice Addl. Secretary - Imtiakum Jamir, ATI Jt. Director & Longsa Gazetted Officers' Union President - Dr. Rongsennungba, Akangjungshi Tatar aser Rongsenmongba Tatar parnokia shilem balala agia liasü. Anküp sentong magidang tanep Akangjungshi Tatar aser Nungsangtemshi Tatar ki maka akhi tsürabur yimya nung sobaliba ken tenyutep.

Kohima nung aliba Sumi kin Tuluni benjong amung



Kohima nung July 8, 2024 nü Tuluni benjong amungba mapang tangokba noksa ka nung Commissioner & Secretary, Y Kikheto Sema aser danga ketdangsürtem angur.

Dimapur, Chiteni/July 09 (TYO): Kohima Sumi Hoho tawabangba kübok Sumi Naga kin asoshi tongtipang benjongmung, Tuluni ya New Ministers' Hill, Kohima nung Y Kikheto Sema'er kidang July 8, 2024 nü munga liasü.

Lanu putu nem sobaliba yimya balala angazükdaktsütsü nükjidong nung iba sentong ya ayongzüka liasü. Iba sentong nung colony 19 nungi chairman aser secretary tem dena liasü.

Iba sentong nung Kohima Sumi tir Shiwoto Wotsa menden liasü aser pai iba benjongmung lanurtem nem angazükdaktsütsü

nüngdakba indang ashi. Tuluni benjong kibur Commissioner & Secretary, Y. Kikheto Sema, IAS ajanga iba benjongmung ratet shia liasü.

Pai Tuluni benjong ya aluyimba dak sendaktepa lir, saka yimdak yimtsüng nung aluyimba ajema akumer, anungji aluyimba yimya asendenshitsü nüngdak kumogo, kechiaser Naga nung sobaliba yangji sendaktepa lir, ta ashi.

Sema-i jila nung aliba nüburtem dang pei mapa nung tali bendanga agütsür inyaktüsü ajungshia liasü.

Pai maneni Sumi kin dang

telungjem yangertsü aser danga kin atema temelenshi bener arutsür akumtsü ayongzüka liasü.

Tuluni benjong ya mürekmejuba, mapa meranga inyakba aser kin tsüngta telungjem adokdaktsüba indang lir, anungji Sumi nung dak aser Naga nung dak item yimya ajitetsüsa alitsü imlar, ta pai ashi.

Iba sentong nung Rev Dr. Kiyeto Sema, Pastor SABCK ajanga Naga nung aser Sumi nung asoshi sarasademtsü aser Khekavi Yeptho, Pastor SBCK ajanga sentong tembanga sarasadem.

National Youth Parliament Scheme atema metetdaktsür

Dimapur, Chiteni/July 09 (TYO): Democracy nung tera ayangba tashi tali itshitsü, yimya tajung sübatsü, shisa opang balala nung tatongi arutsü aser kaketshir nem parliament inyakyim aser yimya angatetdaktsütsü mechi Ministry of Education, Department of School Education & Literacy, Ministry of Parliamentary Affairs ajanga kaketshirtem dang Youth Parliament competitions nung

shilem agitsü ayongzüka lir, ta Nagaland Board of School Education (NBSE) ajanga registered Heads of Institutions ajunga dang sangdong ka nung metetdaktsü.

Registration agitsü atema 4 buba NYPS portal ya lapokogo aser iba ya <https://nyps.mpa.gov.in/> nung angutsü. NBSE nung recognized süa aliba kaketshir reju ajaki iba portal nung register sür Youth Parliament sittings ya

ayongzüksü akok, ta ashi.

Iba competition agitsü atema eligibility, web-portal nung kaketshir reju registration asütsü aser resources atema kaketshir reju temi <https://nyps.mpa.gov.in/> nung angutsü.

Iba dak sendakba nung Heads of Institutions temi kaketshir nem iba osang agüja National Youth Parliament Scheme (NYPS) nung shilem agitsü metetdaktsür, ta NBSE sangdong ajangasa ashi.

Dimapur train lenmang anasa nisung tasü mang ka ngutet

Dimapur, Chiteni/July 09 (TYO): DMR-RXR tsüngta KM 257/6-7 nung train lenmang tezüklen nisung tasü mang (tebur) ka lir ta Station Manager, NF Railway Dimapur nungi July 8, 2024 anepdang 6:20 ako meta tezüluba nung osang ka arua liasü, ta Dimapur Police ajanga sangdong ka nung ashi.

GRPS duty party tem iba tasü mang alidaki ao aser iba nisungba ya arishi küm 20-25 tsüngta non-local ta jangjatet.

Tasü mang nung bushisüngdang maparen inyak aser pa ya train agi tsükset südi ta temulung melemeti lir, ta ashi.

Ozüng agi melaba maparen ajak tembangba sülen tasü mang ya PM examination/jangjatsü

atema District Hospital Dimapur morgue nung yua liasü.

Tereprangtsü sentsü tajung aser kou tanak, long pant sentsü tanak den belt ka agir liasü.

Kibur/kinunger/tembar temi Officer-in-Charge, GRPS, Dimapur den Mobile No. 7085055021 ajanga tongteprateptsü akok, ta sangdong ajangasa ashi.

NAGALAND POLLUTION CONTROL BOARD							
Signal Point, Dimapur - 787112, Nagaland Tel.: 03862-245727, TeleFax: 03862-245726 Website: www.npcb.nagaland.gov.in e-mail: npcb2@yahoo.com							
AMBIENT AIR QUALITY FOR KOHIMA AND DIMAPUR CITY							
KOHIMA ASER DIMAPUR NUNG MOPUNG MERÜK-MEMERÜKBA JENJANG							
Sl. no	City	Location of air station	Type of area	Monitoring dates			Permissible limit As per the National Ambient Air Quality Standards "Iba tasazuk alemabo metudaktsütsüla"
				02.07.2024	04.07.2024	06.07.2024	
1	Dimapur	Bank Colony	Residential	39	20	36	100 µg/m ³
2		Dhobinala	Commercial	81	90	86	
3		NPCB Office, Signal Colony	Residential	22	18	36	
4		Tenyiphe, Chumokedima	Commercial	17	22	32	
5		Nagarjan	Residential	33	24	40	
6		Viola colony	Residential	17	19	33	
7		Burma camp	Commercial	39	46	68	
8	Kohima	Opposite NST Office	Residential	15	17	20	
9		PWD Junction	Commercial	20	23	37	
10		High School Junction	Commercial	33	50	76	
11		Midland (Upper)	Residential	21	29	34	
12		Forest Colony	Residential	17	16	25	

Iba osang ya nüboritem ajangzüksü atema Nagaland Pollution Control Board-i agütsür.

NBSE-i Heads of Institutions dang metetdaktsür

Dimapur, Chiteni/July 09 (TYO): Nagaland Board of School Education (NBSE) ajanga registered Heads of Institutions ajunga dang sangdong ka nung ashiba agi, Class 6 nungi 12 tashi azüngba kaketshirtem subject nung ajemdaker Olympiad nung shilem agitsü asoshi ajungmesotsü mechi annual academic calendar nung "The Constitution of India and Social Sciences" Olympiad inoktsü atema Vishwaroop education ajanga ayongzüka lir.

Olympiad ya ayongzüksü, ta NBSE sangdong ajanga ashi.

Olympiad round mezüngbuba ya November 26, 2024 nü ayongzüksü, koba 75 buba Constitution Day alitsü aser tanabuba round ya December 25 aser December 31, 2024 tsüngta amungtsü, koba Christmas aser Guru Gobind Singh'er jabaso tepsetba anogo lir.

Final round ya January 11, 2025 nü amungtsü, koba Swami Vivekananda asoba anogo lir. Sempet agütsüba sentong ya Dr. Bhim Rao Ambedkar asoba anogo ung agitsü.

Vishwaroop education yagi "Constitution and Social Sciences" nung ajemdaker Olympiad ayongzüksü. Kaketshir nem constitutional values indang tali tajungba nung angatetdakja PATRIOTISM, HONESTY, DEDICATION amala yimyatam angazükdaktsütsü mechi constitutional aspects balala indang illustrations 24 aliba

Iba indang tali tejangjaba metettsü atema 9717412471 nung jembitettsü mesüra vishwaroopedu@gmail.com dangi email sütettsü.

Iba dak sendakba nung Heads of Institutions temi kaketshir nem iba osang agüja Olympiad nung shilem agitsü metetdaktsür, ta NBSE sangdong ajangasa ashi.

Changtongya nung Sub-District Industries Centre semzük

Dimapur, Chiteni/July 09 (TYO): Director, Industries & Commerce, P. Tokugha Sema; SDO (C) Changtongya, C. Wangan; Changtongya Town Council Chairman, Temjen Nungasang aser sorkar ketdangsürtem lia Advisor, Industries & Commerce, Hekani Jakhalu-i July 9, 2024 nü Changtongya nung Functional Manager, Sub-District Industries Centre indang office ka semzüka liasü.

Hekani-i Director aser iba ki yangluba nung shilem agir ajak dang pelaba lemsatepa liasü.

Lai Sub-District Industries Centre, Changtongya nung staff tem dang office tasenba nung tajungba tenzüksü aser nüburtemi aginütsüsa inyaktüsü ayongzüka liasü.

Laisa village council aser Changtongya Town nung aliba nüburtem dang office tasenba ya pei meyong ama anepalua amshitsü aser office nung service agütsüba agitsü aser amshitsü ajungshia liasü.

Chiephobozou Town Council chairman aser deputy chairman shimogo



Dimapur, Chiteni/July 09 (TYO): Chiephobozou Town Council (CTC) atema Chairman aser Deputy Chairman election July 8, 2024 nü Deputy Commissioner, Kohima indang office nung agia liasü.

mulunga CTC indang Deputy Chairman shima liasü. Pa tenüng ya Keviselie Rüpreo-i benok aser Kiyasetuo Kenguruse-i o shidang shia liasü.

Iba sentong ya Deputy Commissioner Kohima, Kumar Ramnikant, IAS lenisüba kübok agia liasü.

Deputy Commissioner Kumar Ramnikant-i züngsem tasentem nem tenüngsang agütsü aser parnok dak nüburtemi tamang akar ta ashi.

Züngsem ajaki mulunga Khriellelie Kerhü-o ya Chiephobozou Town Council indang Chairman asütsü shima liasü. Pa tenüng ya Lhoubeituo Kezie-o ajanga benok aser Khriellelie Rio ajanga o shidang agütsü.

Pai Chairman, Deputy Chairman aser councillor tem dang Chiephobozou Town renloktsü asoshi lungjemer inyaktüsü ayongzüka liasü.

Kasaji Kekhrieneinuo Zumvü ya züngsem ajaki

Kasa senden nung Deputy Chairman, Kekhrieneinuo Zumvü-i bendanga agütsür tajungtiba nung nübur tenzüksü temulungtetba lemsatepa liasü.

Russia nung consulate ana lapoktsü: PM Modi



Ato Kilonser Narendra Modi-i Moscow Russia nung sepaitem leper nung aküm tetushi agütsüba noksa nung angur.

New Delhi, Aami/Junr 9 (Agencies): Ato Kilonser Narendra Modi-i anogo ana atema Russia semdangba mapang Mongolbarnü, Russia kübok Kazan aser Yekaterinburg nung consulates tasen ana lapoktsü aliba metetdaksüogo.

Russia nung India nungertem den o jembiba mapang PM Modi-i, term asemubaba atonga PM akümba sülen tang mezüngbuba bendanglen India nungertem den sensaksem ta ashi.

"Ni nenok den osang tajung lemsatepi aru. Onoki Kazan aser Yekaterinburg nung consulate lapoktsü telemtetba agiogo. Iba jenjang agiba ajanga senzüsönpongsü atema maongka tali agütsütsü aser shishilembaba ajungkettsü," ta

PM Modi-i ashi.

Paisa, India aser Russia na tesendaktep ajungketba atema tir Vladimir Putin nem tenüngsang agütsü aser ashiba agi, taoba küm ter tsüngda pai Russia trokben semdangogo aser Putin den tertenetben ajurutepogo.

"Küna ajurutepba shia temulung lemtepba aser akümtsübu ajungkettsü nükjidong nung ajurutepogo. Mepetmesü adoker linük nungi kaketshirtem taolen makai aliba mapang tir Putin-i parnok nem teyari agütsüogo. Ni Russia nung aser kü medemer tir Putin dang kanga pelar," ta PM Modi-i ashi.

Paisa, India aser Russia na aso 17buba nung Astrakhan nung India House amenokba mapang nungi tesendaktep

tajung nung arudar, ta ashi.

PM-i, International North-South Trade Corridor aser Chennai-Vladivostok Eastern Maritime Corridor densema tesendaktep tasen asoshi jenjang agiba dak rangloker jembia liasü.

"India nung kaketshirtem aika Russia nung azünger aser idaki India kübok state shia nungi lokti tentettem lir. Iba ajanga state sobaliba, chiyongtsü, oshi aser benjungbentsü wazüka ayutsü teyari agütsür," ta pai shisem.

Küm pongu tsüngda PM Modi-i tang mezüngbuba Russia semdang. Russia den India shishilemba liromemedemi aliba aser Ukraine rara nung India nungertem pua aliba chiokdaksütsü nükjidong nung pai Russia semdang.

Delhi court-i Kejriwal atema production warrant agütsü

New Delhi, Chiteni/July 9 (Agencies): Delhi court kati Mongolbarnü, Enforcement Directorate (ED)-i benokba senotsü ochi mashi ken o nung Delhi chief minister Arvind Kejriwal atema production warrant ka agütsüogo. Court-isa excise policy dak sendakba nung supplementary chargesheet tenetbuba benokba agizüka asadangogo.

Kasa mapang nung court-i, ED-i benokba supplementary chargesheet tibuba agizükogo aser Vinod Chauhan nem production warrants agütsü aser ken o nung aija alir Ashish Mathur jaokogo, shiba supplementary chargesheet tibuba nung shisema lir.

Special judge Kaveri Baweja-i, chargesheets agizüka

asadangba mapang, aija alirtem anema jenjang agitsü atema kuli teper lir, ta ashiba den iba ken o July 12 nü angdangtsü lemtetogo. Iba anogo aija alirtem ajak okadaki tsüngtong arutsü.

ED-i, May 17 nü 200-page chargesheet ka benokogo aser iba nung Kejriwal aser Aam Aadmi Party (AAP) aibelena alirtem rongnung densema lir ta shiogo.

Arishi küm 55 tain AAP convenor ya ED-i March 21 nü apu. Delhi high court-i, pa aputsü aliba atema interim protection ka agütsütsü mepeshiba magizükba sülen ghonda ishika lir Kejriwal pua liasü.

ED-i ashiba agi, Kejriwal iba policy yangluba, kickback

scheme aser senotsü ochi mashi ken o nung densema liasü.

Kasa mapang nung ED-isa, aija alirtem rongnung Chauhan, shiba Delhi nungi Goa-i sen crore 25.5 bener aoba nung densema liasü, pa Kejriwal den kanga junga sendaktepa lir, ta ashi.

Iba agency yagi Jule 28 nü supplementary chargesheet tibuba benokogo aser Chauhan aser Mathur nata aibelena alirtem rongnung densemsüogo.

ED-i, Chauhan ya Prevention of Money Laundering Act (PMLA) kübok May 3 nü Goa Zonal office nungi apu aser Mathur shiba Chauhan den sendaktepa lir pa tapubo mapu saka chargesheet nung shisema lir.

MHA-i Sikhs for Justice telok nem küm 5 tenokdangba agütsüogo

New Delhi, Chiteni/July 9 (Agencies): Ministry of Home Affairs (MHA)-i Mongolbarnü pro-Khalistani kiralongrar Gurpatwant Singh Pannun-i aniba Sikhs for Justice (SFJ) telok nem ano küm pongu atema tenokdangba agütsüogo. Iba telok nem mezüng 2019 küm tenokdangba agüja liasü.

Home ministry-i sangdong ka ajanga ashiba agi, SFJ puri India security aser nüburttem mesüngjemteti toktsütsü atema inyakyim balala nung shilem agir. Ministry-isa, SFJ inyakyim ajanga linük yimjung, telungjem aser integrity minpronger, ta ashi.

SFJ pur ya India sovereignty aser territorial integrity minprongsü atema Punjab nung anti-national inyakyim balala nung densema liasü, ta ministry-i ashi.

SFJ pur ya Punjab aser tanga tesem kar nung India nungi Khalistan linük ka kümteptsü atema telungpur telok balala aser parnok inyakyim

nung sendaka aliba atema aitsüogo.

Ministry-i ashiba agi, iba telok yagi India nungi linük balaka akümtsü atema inyaksangshitsü asoshi ajungshiba aser teyari agütsüba aser iba atema India aser tangalen rara aliba separatist teloktem yariba nung densema lir.

Centre-i ashiba agi, iba amala ozüng alema inyaksangshiba ya tangsa tang maziükra pro-Khalistani telok yagi parnok inyakyim tali ajungkettsü aser ozüng ajanga amenoker aliba sorkar tashimeiti küm dakja India nungi Khalistan Nation kümteptsü merangtsü.

Gurpatwant Singh Pannun ya 2020 küm Centre-i kiralongrar ka ta sangdongogo. Pa ya Sikhs for Justice (SFJ) ngutetertem rongnung ka lir aser pai US, Canada aser UK nung Sikh nung atema Khalistan ta nungja agütsür linük tasen ka kümteptsü atema inyaksangshia arudar.

INDIA aser NDA na assembly menden 13 nung toktepshtsü

New Delhi, Chiteni/July 9 (Agencies): Bharatiya Janata Party-i aniba NDA aser Opposition INDIA bloc na tanaben toktepshtsü atema renema lir, kechiyong state tenet nung assembly constituency 13 nung July 10 nü by-election agitsü lir. Iba election vote July 13 nü azüngtsü.

Bypoll ya West Bengal nung menden pezü; Raiganj, Ranaghat Dakshin (SC), Bagda (SC) aser Maniktala; Bihar nung Rupauli; Punjab nung Jalandhar West; Himachal Pradesh nung Dehra, Hamirpur aser Nalagarh; Uttarakhand nung Badrinath aser Manglaur; Madhya Pradesh nung Amarwara aser Tamil Nadu nung Vikravandi menden atema agitsü.

MP tem asüba mesüra candidate temi mapa toktsüba ajanga item mendentem nung election agishitsüsa kümogo.

State ajak rongnung West Bengal nung election ya tongtibangba asütsü, kong 2021 küm election nung BJP-i menden 4 nungi 3 koka liasü, saka BJP MP tem Trinamool Congress-i aoba ajanga election agitsüsa aküm. Raiganj aser Ranaghat Dakshin nungi Krishna Kalyani aser Mukut Mani Adhikari na tokteptsü, shirnok taoba mapang BJP nung dena liasü saka tang TMC ticket bener tokteptsü.

State tem rongnung ano Uttarakhand-a tongtibang asütsü, kong Hindu nung

atema temeshi tesem Badrinath lir aser iba ajanga vote agütsüba yimya melenshitsü ako.

Badrinath constituency nung taoba Congress MLA Rajendra Bhandari BJP nung adenba ajanga menden tazüng aküm aser tang pa Congress candidate Lakhat Butola den tokteptsü.

Manglaur kong Muslim nung timba lir, iba constituency nung Congress-i lenir tejen Qazi Nizamuddin shimogo, shiba iba menden asemben koker lir. BJP-i tang tashi nung iba menden khen danga koka mali aser parnoki Kartar Singh Bhadana shimogo.

Tamil Nadu nung AIADMK-i Vikravandi menden atema election nung shilem magitsü telemtetba agiogo, kechiyong parnoki election ya democratically magitsü ta bilemer.

Himachal Pradesh nung Congress-i Chief Minister Sukhvinder Singh Sukhu kinungtsü Kamlesh Thakur yoktsü. Punjab kübok Jalandhar West nung Chief Minister Bhagwat Mann-i AAP candidate Mohinder Bhagat atema nübo yimtsüogo.

Bihar nung RJD aser JD(U) na tokteptsü. Madhya Pradesh nung BJP pur Congress lenir tejen Kamal Nath indang constituency akoktsü merangtsü aser parnoki Kamlesh Shah shimogo. Congress-i Dheeran Shah Invati shimogo.



Tzünglu kanga sashia aruba sülen Uttar Pradesh kübok Pilibhit nung tzu agi metsünger aliba lenmang ajanga nüburttem süiba noksa nung angur. Relief Commissioner GS Naveen Kumar-i ashiba agi Pilibhit nung tzumetsüng ajanga yimtsüng 252 dak kongshiogo.



TIR YIMYIM YIMOBILEM (EDITORIAL)

DIMAPUR RASEMNÜ, JULY (CHITENI) 10, 2024

Tesempatep adokdaksüba

Loktiliba nung nisung o nisung na tsüngda aser kin o kin na tsüngda temeimtep adokdaksütsüa temela aser tesempatep adokdaksütsüa kecha tasak mali, ibaji asenoki kechi bilemer aser kechi o jembir ta asüba dak keta lir. Ano, talisa alima nung nisungtem putepdaksütsü mesüra tsükchitepdaksütsüba ya yimten aser lokti lenirtem dak tuluka keta lir. Tatishitsü agi, India ama sobaliba aser tamangba yimsü temeyoktep aika alidak Hindu nung yimsüsürtemi Muslim nung majungba dang jembia parnok anema-anema dang jembira Hindu yimsü dak amangba nübertemi Muslim nungertemji mesempai sempatsü. Ano külen, Muslim nung yimten lenirtemi Hinhu nung majungba indang dang jembira Muslim nungertemji Hindu nungertemji tsükchir ama bilemtsü. Kasaji, Hindu aser Muslim nungertemji Khristan-tem majungba dang sükshia parnok anema, parnok anema dang lokti senden ajunga nung jembia jajara meteta aser memeteti Hindu aser Mulism nungertem asoshi Khristan-temji parnok tsükchir akümtsü. Aji oda, Khristan lenirtemia Hindu aser Muslim nungertem dang temeim sayutsü melen parnok majung aser parnok meshitakba dang jembira, aji agi Khristan purtem mulungjang nung tangar meimtsü melen sempadaksüba shisatsü tamajung ka enoktsütsü. Tanü yangibo asenok tazüngertem nem angatetdaksütsü meranga tatishitsü amai ka dang amshir, saka alima tesem aika nung, talisa, tamangba yimsü tsütsü nisungtem rongnung meputep adokdakja tsükchitepdaksüba angur. Itemji Arab aser Africa limatem tashi asüngdangtepa maoyonga asen alidak India lima nunga tesem balala nung anogo shia yimten yimsüsürtemi tamangba yimsü agi anar yimten nung takok aser tajangzük bushi dang nübertem tsükchitepdaksüba angur. Aji oda, India nunga talang nung aliba tanga state-tem nung atalokba asenoki angashiba dang masü saka asen kidanger Manipur nung Meitei nung o Kuki nung na tsüngda yaküm küm May ita nungi rara tenzükba tang tashi tensa mesüngjemteti tamajungba-tamajungba aoba ya, Meitei nungertemji Kuki nungertem den mejungtepnüba agi masü mesüra Kuki nungertem Meitei nungertem den meputepnüba agia masü saka parnok yimten lenirtem rongnung kati ka majung jembia – jembia tsükchitepdaksüba mapa ka lir. Aji oda, kuli aika bushia maoyonga Meitei aser Kuki nungertem na rara tenzük nung Imphal lenden nung aliba Khristan-tem tenla ki rongdoktsüyonga aobajibo Meitei aser Kuki nung na tsüngda raraba dang nungi taoba aser tuluba küma aoba reprangteter. Imphal lenden nung aliba tenla kintem jagibo nisung shinga anema tamajungbo meinyakka asütsü, ajsüaka tanga yimsü tekülem kitem ajak toktsür Khristan-tem meyong tenla ki dak dang teka aiba mapa nungji angateta adoker. Ashiko, Delhi nung alir yimsüsür kar asoshiho Manipur nung Meitei nung o Kuki nung na raraba ya Hindu nung o Khristan purtem ba rara amai bilema alitsüa akok, ajsüaka parnoki metettsüba kaji Meitei nungertem rongnunga Khristan tajung aika lir. Aji oda, linük nung shiba südirsüaka tamangba yimsü tenüng nung yimten tashi agitsü merangra, iba jagi takoksa aser tebilemtsüang tuluba akümtsü. Aji oda, küm noklang pezü-pungo jakdang tanü ama India rangben küma longjema malidang tangar bendanger kintem amakba indang jembia tanü parnok dak mang ayangtsü bilemra, ibaji tejaklen repranga nübertem tajungleni aniba tangatetba mulungjang masütsü. Kasaji, tanga yimsü nungi Khristan akümtsü nokdangtsü mechi nung achiajamba tashi nung talenba yoka ozüng latetra, iba jagi nübertem tajung akümtsüba masü saka tetsükchitepang tali atentsü. Tzü menendaksür ango apubajibo junger saka nisungtem rongnung tesempatep adokdaksür rongronga alidang lenir akümtsü merangba jaklajibo tajung tazü masü. Ibaji pei lima aser pei nübertem ashioksüba mapa asütsü. Tamangba yimsü ajaki temeim indang jembir, anungji yimten yimsüsürtemia nübertem rongnung tesempatep adokdaksütsü bilema masü meimtepaksütsü bilema jembitsüla. Yimten nükdangbo tamanger tajung ka ta asüba dang nungibo senso tajung ka ta asübaji tongtibangba asütsüla.

OLEMSABANG

TEYAZÜ AJANGA OCHI MIMPANGTSÜBO AKOK, SAKA OCHI MELENSHITETSÜBO MAKOKER

~ Tinuniken, Mangkolemba.

Ochi kodanga meloatsü, tanü lao-aka asüng saktsü. Tapu tapu tasa ajanga nebur tangatetba teindang raksadaksütsü sendong yanglurtem shirnoki küsa nebur temeten alizüktsü meranger aser neburia pei temeten yoka achitsü mulungteter telok anaprongla dangji tarutsü nükla maliba nebur telok ta ajatsü. Tsümai nashi alie alunung jenjang ai au-ra katepa mulungtep nungdang nashiji alia bener atur. Iba metem alitsü bushir aser tayoktsü ata-a alir telok anaprongla küsasa tangatetba aliba yong pei temeten Sen agi mapayui yoka achir. Parnok dangji tangatetba agi kangasa ajema anunga aliba nebur, nükla maliba meimchir mesura shirurua memeyongba khristan ka ta ajatsü akok.

Kidang metsüba shiruru tatishitsü agi nashi, azü, ak yamala shirurua mashidang sen talang agüjaka mayoker. Saka pei temeten nuchibabo melamela alizüktetsüsa litetba khristanpur dangji azü ak memeyongba taküm tasa ja-a aru. Tetsü tebu senmang mebilemdangi raksadaksütsü jangrar telok nem nungjalok asem jaloktsüdi- Yihuda Iscariot, Pilate aser Tanüjungba/Tanüjungla.

Parnok dangji pungali nung sungo lu nung inyker ta ajar. Pungali nungeri tanep chiyongerbo taonung chiyongtsü indang mebiilemer. Asüng indang meshisadangba.

Tenungdak jaloka Nagaland nung maparen ajak nung tatishitsü agitsüsa dang inyaker.

Sovima cricket stadium küm aieka saka meyagluzük jungi raksadaki. Sorkar anema, contractor anema kecha meshitetsüsa temulungjangi-bo aitsü-aka tepangi menanzüktetba metem ola madoktetsüsa temeli aser terok raksa-a-dok. Khristan liba liro den mapetba election mapang inyakba yong, pei temeden atema ola madoktetsüsa aser adok yonga magizüktetsüsa lisa-a litetba tajangzük asangsang nung angur masü no. khristan nebur aser lenirtemi ya meteta alitsü ano maneni nenshir- "Meimchirbo Tsüngrem dak atsükoka litetsü, saka Tsüngrem nungibo meimchir atsüka alitsü makok".

Khristan neburtemi yimya jakla tamajung lenir dang sayur-ji lenir-i anisar masü nebur-ang lenir anisar aser temaba menden nung alirtema parnok rongnung sungyanglu külemba dang nungia taoba küsa menden nung mena alisangji külem nungdang pei jurila ajangzüktetsü aser nebur tiptemtsütsü tangatetba nung kar-ji külema nebur anisaba agi tanü Naga lima tesem ajak nung kati ka dak mulung melemtetsüsa kümadokba yong sen agi alia ochishirtem teyazü kümdaksür, pangdak nung inyaker khristan tajungtemi ochi nisung merenshia teyazüsang to kümzüka ayur. Naga lima rajang kümdaksüba teraji teyazüsang kümzüka ayubaji lir. Saka TSÜNGREMi ashir sungyanglu tekülem.

Angashitsü saka mangatetsü, angutsü saka machitetsü iba oren ya ken jungjunga dang khristanpur ajaki su-oki yi-a shisa pei sasa rateta agiangma.

Takar kidang Sen agütsür ayuba dang kilir ajar aser sen talang agütsür alia bener arua ayuba dang alar ajar. Saka metet senmonga Naga neburtemi kilir tanga teküpokba alar-ang akümtsü shimba küli election aruba shia tom tanülai khristan pur pudaksür, pei meyong temeten senti vote yoka doker. Tetezü naji alar tia nu sasa kümadok.


Anungji Kibur jake kechi shidir angatsüba dak alaka tanga lemanng kecha mangur.

Alar nungi nuchi akümtsübaji temelabo masü saka meranger makokba kecha mali. Kong temulungtetba lir yangji takokba lir. Yimya tamajung küm aieka suba aruadokba indoktsü-ji tasaktiba. Kodang temulungtetba tejangraba den külemi tangatetba takang arudaksüdir merok mi ama jangrutsüsa.

Merok mi jangrudaksüdi, ochi nangri kanger yim yim ayongdima, tamajung jaklatem aser mapatem meshimeshia samadaksür sungjang lijang tajung tanga chitetba sungdong atemtsüla aser tejang madangba sungdong atsüteter rongdokdi. Khristanpur ka ama yimya jakla liro tim tesu nung TSÜNGREMi agizüktetsüsa liba liro tepdima.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pakistan nung tamanger Julian James ya major general shimogo



Major General Julian Moazzam James

Islamabad, Chiteni/July 09 (Agencies): Major General Julian Moazzam James ya Hokulbarnü promotion anguba sülen elite Special Service Group (SSG) nungi Pakistan mitkar otsü nung Khristan kati iba jenjang tongtetba pa mezüngbuba akumer. SSG ya Pakistan Army indang special operations force lir.

"Ibai Pakistan nung aliba Khristanpur asoshi tejak tentetba anogo ka lir, kechiaser nisung ka 'Major General' jenjangi ajungketba onoki benjonger. Pakistan Army küm 76 puti otsü nung tang mezüngbuba otsü yanglua Jullion Moazzam James ya mezüngbuba SSG Khristan Commando Officer Major General kumogo, aser iba alizüng tongtetba yagi asenok tejak tenteter," ta Church of Pakistan nung Bishop Azad Marshall-i sangdong.

India nung Minister of

Defence, Rajnath Singh mendenpuba sür amenba Shanghai Cooperation Organisation indang defence minister tem 2023 küm April ita India nung senden amendang Pakistani military delegation ya James-i anir oa liasü, ta osang ajanga ashir.

Pakistan indang 2017 census nung nütsüng yongsük million 207 aliba nungi Khristanpur nütsüng yongsük ya shilem 1.27 mesüra million 2.6 shi lir ta ashir.

Pakistan Armed Forces nung Khristanpur nungi mezüngbuba major general ya Julian Peter liasü. Peter ya March 2023 nung asü aser pa 4th Frontier Force Haidry Regiment nung shilem ka ama 1971 India-Pakistan rara mapang tang Bangladesh ta ajaba East Pakistan kübok Hilli Sector nung rara liasü.

Iba mesük 2009 küm ano Khristan officer Noel Israel Khokhar ya major general

mendeni ajungket. Pa ya tang Ukraine nung Pakistan indang ambassador ka ama inyaktar.

Taküm June ita Dr Helen Mary Roberts ya brigadier jenjangi ajungket, koba Pakistan nung Khristan tsür mezüngbuba iba jenjang tongteter alitsü. Roberts ya senior pathologist ka ama Pakistan Army Medical Corps nung tenzük aser Pakistani military nung tetsür surgeon general mezüngbuba liasü.

Iba ama Pakistan nung Khristanpur züngsem temi Pakistan Air Force nunga tenzuka lir. Yangji Air Commodore Nazir (Bill) Latif dena lir, shibai 1965 aser 1971 rara nung raraogo.

Wing Commander Mervyn Leslie Middlecoat ya Pakistan Air Force nung pilot tejangja ka liasü, shiba kasa tamanger ka lir. 1971 rara mapang pa indang tayimtsü ya Indian Ocean nung khazüka yok.

ANOGO ABEN TSÜNGREM DEN

Anogoshia tepela

"Teimla nung pela-ang, timtem tekangshi nung aremzükang" (Rom 12: 12).

Aiben asenoki rara malibaji taküm nung tepelaji lir ta bilemer. Teimla nung pelaang aser timtem tekangshi nung aremzükang ta Laishibai ashir (Rom 12: 12). Yisui anguba maksü aser timtem agi Pa tepela nokdangtsü mekoki liasü, kechiaser pai aremzük aser teimla ayu (Ibri 12:2).

Miim tepelaji, mapa tasak agizüka jangjungmara mesüdaktsüi inyakba, aser tuokrong tia aremzuka bentetbaji lir. Kodang timtem nung anüngba anener, tenüngsang agütsür aser tepela angur. "Tajepba kaonung saka anepdang tepela arur" (T. ken 30:5b).

Taremzük melira tepela samar. Takümji ayong aika, sentaka aliba ka lir. Yimzuka aolen makaba ayong kecha mali. Taremzük makaba jagi taitlen aser taolen tetsüngda mapang timtem mapang kümdaktsür. Yisui ashi, "Asenoki külen jagi odi", iba tetezü asenok tetsüngda nung maraksettsüla (Lk. 8:22-25)

Taremzük makaba teloki parnok tepelaji dang tepseter masü, saka parnoki tangar tepelajia tepseter.

Tangar tepela nung peladaktsübaji miim tepelaji lir. Tepela kibongji taremzük agi yanglur. Kinüngbui kinüngtsüi renemba magizüktetba jagi kinüngtsü tejangraba tepseter. Kinüngbur mabensaba kinüngtsüi maremzüktetba ajanga kinüngbu ina terenlok akatsüba nung nokdang. Tanur tsütsü tsüraburi taremzük makaba ajanga tanur tepela tepseter.

Nigeria nung kiralongrar mechi tekülem ki 70 shibangogo

Abuja, Chiteni/July 09 (Agencies): Kiralongrar temi amakba mechi central Nigeria kübok Plateau state nung tekülem ki 70 shibangtsüsa akum aser linük northwest tsütsü putir ka pua bener aoba Deobarnü (July 7) chiok, ta osangtem ajanga ashir.

Church of Christ in Nations (COCIN) indang tir Rev. Amos Mohzo-i Christian Daily International-Morning Star News dang ashiba agi, Fulani shiruru metsürtem aser danga kiralongrar temi amakba ajanga Plateau state indang Mangu aser Bokkos county tem nung arogo 70 nung küm ana tekülem sentep magiteter arur.

Taoba küm December ita Khristmas mapang amakba ajanga COCIN arogotem nung kongshi, ta pai ashi.

"Ozü züngsemtem tepset, nüburtem tepset, nisung aika ki raksatsü, aoksatsü aser onoki kecha meinyakteter. Onok taolen maka, saka onoki tayongzükba ajurutsüsa aser lendong timtem ajurua liaka Khristanpur Internally Displaced People's (IDPs) camps nung Khristmas munga liasü," ta Pastor Mohzo-i ashi.

Mangu area nunga iba ama lendong agütsüba ajanga COCIN arogo 40 shi shibangtsüsa akum, ta pai ashi.

"Ozü arogo nung züngsem timba tesem balala nung prokshia lir aser aika camp tem nung alir. Khristanpur timba tesem ka nungi kati oa takum alitsü mesüra chiyongtsü bushia senzür," ta Pastor Mohzo-i ashi.

Bokkos area nunga arogo 30 shi samaogo ta pai ashi.

"Item tesemtem nung tekülem ki timba kiralongrar temi rongdoktsüogo. Item tesemtem nungi internally Displaced Khristan tem tang tashi pei yimtsüng alema orr camp nung alir. Aser tanga parnok timba aluyimer asünung alui moteter," ta Pastor Mohzo-i ashi.

Khristanpur kar tasü ita pei lui meyiba aortemi pei sasa pei kumzüksü atema telok telok tenteta lir, ta ashi.

"Kiralongrar, shiruru metsürtem aser bandits temi tanen makai amakba yong arogo züngsemtem tang tashi pei lu bushia oa mapa meinyakteter. Item lendong nungi jenbua alirtem pei yimtsüngi tanaben anir aotsü meranger, saka onoki tekülem ki dang masü saka

parnok ki yanglutsütsüsa akumer," ta ashi.

Kasa mapang northeastern Nigeria nung Boko Haram aser Islamic State West Africa Province (ISWAP) ajanga lendong agütsüba mechi COCIN evangelistic outreaches mapa meinyakteter.

"Ni Nigeria northeast tsütsü Gwoza Local Government Area kübok Limankara jila nungi aser ozü yimtsüng ya Ngoshe Sama lir, koba tenem nung lir. Küm ishika jakdang Boko Haram-i ozü yimtsüng agiogo aser parnok yangji tang tashi lir. Anungji item tenem ya Boko Haram kiralongrari amokbanger Limankara aser Gwoza jila tem angur. Item kiralongrar ya tenem nungi alua ozü nüburtem amaker aser meyiba aor," ta Pastor Mohzo-i ashi.

June 29 nü Gwoza amakdang Khristanpur aser Muslim nunger aika takum samatsü, ta pai ashi.

"Onok külemi alir. Ajisüaka telungpur aruba, Borno state nung Boko Haram poktetba ajanga nisung aika tepsetogo aser aika pei yimtsüng yutsür tesem balala nung jenshia lir.

Taolen malirtem kiralongrar temi amakdang asür," ta Pastor Mohzo-i ashi.

Nisung jenti pua bener aoba mechi March 2023 nung Boko Haram kiralongrar temi kinungtsü den külemi pua bener aosang pastor Rev. Paul Musa sen yong alangzüksü atema sen mebendenteter, ta pai ashi.

"Arogo ka ama onok ya lemtamatar lir, aser kiralongrar temi pua bener aoba pastor tem alangzüksü atema onoki sen mebendenteter. Ibai talisa northern Nigeria nung arogo züngsem aser pastor tem kiralongrar temi pua bener aor. Anungji parnok alangzüksü atema sen bendentsü makoker," ta Pastor Mohzo-i ashi.

Ajisüaka COCIN lenirtemi kija aser lokti tentet balala dang Pastor Musa aser arogo züngsemtem chioktsü atema yaritsü ayongzuka arur. Pastor Musa aser pa kinungtsü ya küm ka dak tema pua yua lir.

Pastor Musa aser pa kinungtsü pua bener aor Boko Haram Islamic extremist kiralongrar temi parnoki meshiba sen hopta ka nung magütsüra tepsettsü ta amokmerena liasü.

Parnoki amokmerener hopta ka dak tali süyioogo aser pa pua alirtem nungi osang kecha mali," ta Pastor Mohzo-i ashi.

Nigeria northwest tsütsü Zamfara state nung Roman Catholic putir Mikah Suleiman ya June 22 nü pua bener ao aser July 7 nü chiok, ta Sokoto Diocese ajanga ashir. Pa aser arogo ketdangsurtemi pa apur tenüng meshitet.

"Ni kumzükba nung yariba aser sarasademtsüba atema nenok ajak dang pelar. Tsüngrem taochi ajanga ni bandits ket nungi chiokogo," ta Suleiman-i video ka nung ashiba Deobarnü saya liasü.

2024 World Watch List ajanga alima nung Khristanpur alitsü asoshi tamajungtiba linüktem asadanga nung Nigeria ya jenjang trok buba nung lir.

Khrista sülen anidaktsü asoshi alima nung Nigeria ya tamajungtiba linük lir, kong October 1, 2022 nungi September 30, 2023 tsüngta tamangba yimsü mechi nisung 4,118 tepsetm ta Open Doors indang 2024 World Watch List nung ashir. Kasa mapang Nigeria nung nisung 3,300 pua bener ao.

AO OSHI ANGAZÜKDAK:

TANÜ ANGAZÜKTSÜBA OJANG



Tajemba

(adj) ishiba, aika masü (lesser, not much)

* Mokokchung nung oset aika jenjang tajemba agi angur.

Tajemtdak

(adv) tetsüing nendakdak (base, stepping stone)

* Alu lenmang nung tetsüing tajemtdak mali timtem ajurur.

OLONG PAITEP # 6842

1			2		3		4		5
6		7							
					8				
9				10					
							11		
			12						13
	14								15
					16				
			17						
								18	
19									

TIPIEN

- 2. Teburtemi tejak nung awaba
- 6. T___em
- 8. Tzüik ayudak
- 9. Nüingdakba dang timba
- 11. Züina ao
- 12. Yangi tzü angur
- 14. Tangar dang nungi tali
- 16. Senyong masü
- 17. Oadokdi
- 18. Tzü tarok
- 19. Yimtaklir aikati iba ya ki den külemi yanglusemer

LANGTSÜNGLEN

- 1. Temejangdak
- 3. Nisung ka mapa inyaksü nübo
- 4. Azüntsü asoshi mejemba
- 5. Tesangwa agütsüba
- 7. Tila masü
- 10. Tebenjem tetsür chanu
- 11. Tekolak nung inok
- 12. Tetsüingda
- 13. Tangar inyakba ka inyak
- 14. Tim masü ta ashi
- 15. Asalendong
- 16. Tanü dangtsü

OLONG PAITEP # 6840 TELANGZÜBA

TIPIEN :

- 1. Telok, 4. Aluru, 6. Ozüing, 8. Emk,
- 9. Kin, 10. Teti, 12. Süir, 13. Jen,
- 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden,
- 3. Kiochtsü,
- 5. Lenti, 7. Tajangzük,
- 11. Teronem, 12. Sempa,
- 13. Jahaz.

NAI-A YA METETTER MA



Assam nungi kaketshir Rajdeep Kashyap-i Guinness World Record ka yanglutetogo. Rajdeep ya Nalbari College nung Botany undergraduate student lir aser pai "fastest book writing" otsü yanglutet. Rajdeep ya Nalbari district kübok Arangamow nung lir aser pai ghonda 9 nung Assamese kaket "Jonmo- Prem- Mrityu, Kisu Bogyanik Kisu Aaloukik" (Birth- Love- Death, Some Scientific Some Supernatural) zülüzüka liasü. Iba kaket nung tapak 84 lir.

Congress MP Gaurav Gogoi-i 'double engine' sorkartem aitsür

Guwahati, July 9, 2024 (Agencies): Assam nung tzümetsüing khuret teti atema koktetsü nungdaker aser senotsü aika endoktsüla ta Congress MP Gaurav Gogoi-i ashi.

State aser Centre sorkari Asam nung tzümetsüing atema shitak meinyaker ta Jorhat constituency nungi Congress MP Gogoi-i ashi.

Tesüiba küm 8 tashi Centre aser state nung "double-engine" BJP sorkartemi Assam nung mapa teinyaksü meinyak ta pai ashi.

"Tzümetsüing aser ali anenzüka aoba atema long-term solution nungdaker aser ensotsü aika nungdaker" ta Gogoi-i ashi. Assam nung küm aika alima lendong balala ataloka aruaka item khuret atema mapa balaka

meinyaker. Central Water Commission-ia Assam khuret atema mebilemetsür, ta paisa ashi. "Central Water Commission-i mapang talangka Assam senzüka yutsür. Ni union Jal Shakti minister dang Assam semdanga tzümetsüing ajanga takoksa bentsür aruba reprangtsü ayongzükur" ta MP Gogoi-isa ashi.

Khasi Students' Union-i Meghalaya nung "non-tribals" mita aoer

Guwahati, July 9, 2024 (Agencies): Meghalaya nung ozüing alema aruba azüoktsü atema Khasi Students' Union (KSU)-i "non-tribal employees and businesses" mita aoer.

State sorkari work permit inyakyim aser Inner Line Permit (ILP) system meinyaker ta shia Mawlai o Mawprem nung KSU unit temi Hombarnü non-

local tem jangjatepa ogo. Iba mapang KSU-i non-tribal workers 117 ket nung labor licenses aser EPIC cards dena kulikaket tejangja maliba putet.

Parnok ya Nepal, Bihar, Uttar Pradesh aser tanga state tem nungi aruba liasü. Polo aser Demseiniong nunga KSU-i mita aoba sülen

dokan kar shibangtsü. Anogo ana tejakdang Guwahati-Shillong Road nung KSU-i unauthorized ILP check gate ka lapokba sülen iba mapa inyakogo. Meghalaya sorkari ozüing alema arurtem azüoktsü atema mapa inyaksüla ta rongshia KSU-i ozüingi memelaka check-gate ka lapokogo.

Manipur nung Kuki nunger telungpur 5 apu

Imphal, July 9, 2024 (Agencies): Manipur nung tesüiba ghonda 24 tsüingda Kuki telungpur ta temlung meleme bilemer nisung 5 puogo.

Central aser state security forces külemi mita aodang telungpurtem apu.

Osang tejangja kar angazükba sülen Central Reserve Police Force (CRPF), Assam Rifles aser state security forces külemi Hengjol

yimtsüing nung mita ao. Mongulbarnep 4:30 ako meta mita aodang telungpur 3 apu. Parnok ket nungi AK-series rifles, bulletproof jackets, injang aser taittsü aketba kulikakettem angu.

Par asem apuba atema tetsürtemi sepaitem anema lungkak aita liasü aser tensa tamajungba akümba agi tenük amshitsüsa aküm.

Iba mapang tetsür ana terara yirua lir ta osang angazükur. Maneni, Tamenglong district kübok Phaitol aser Jiribam district kübok Leingangpokpi yimtsüingtem anasa khatepba sülen sepaitemi Kuki nunger telungpur ta temlung meleme bilemer nisung ana apu. Mongulbarnep tenaprong den prangpong ajak police station ket nung agütsüogo.

**GOVERNMENT OF NAGALAND
DIRECTORATE OF TECHNICAL EDUCATION
KOHIMA, NAGALAND
NOTIFICATION**

NO. DTE/ ESTT-2/02/2021-22/: This is to notify to all the aspiring candidates who wish to avail State Reserved Seats in Under-Graduate Degree Courses in the following Colleges/Universities for the academic session 2024-25 may collect the prescribed application form from the office of the undersigned during office hours on payment of Rs. 400/- (Rupees four hundred) only. Form can also be downloaded from Department website: www.dtenagaland.org.in.

Sl. No.	Branch	No. of seats	Eligibility	College/ Institute
1	B. Tech. (Food Technology)	04	Passed 10+2 with PCM/ PCMB 40% marks for SC/ST/PC candidates	(i) College of Agri. Engg. & Post Harvest Tech. Gangtok, Sikkim. (ii) College of Food Tech., Imphal, Manipur
2	B. Tech. (Agricultural Engg.)	11	Passed 10+2 with PCM/ PCMB 40% & 45% marks for SC/ST/PC candidates	(i) College of Agri. Engg. & Post Harvest Tech. Gangtok, Sikkim. (ii) School of Engineering & Technology, Dimapur
3	Computer Science & Engineering	08	-do-	(i) Tripura Institute of Technology, Narsingarh, West Tripura (ii) School of Engineering & Technology, Dimapur (iii) Gauhati University Instt. Of Science & Technology, Guwahati
4	Electronics & Communication Engineering	07	-do-	-do-
5	Information Technology	06	Passed 10+2 with PCM/ PCMB 45% marks for SC/ST candidates	School of Engineering & Technology, Dimapur
6	Biotechnology	06	Passed 10+2 with PCMB/ 45% marks for SC/ST candidates	-do-
7	Civil Engineering	01	Passed 10+2 with PCMB/ 40% marks for SC/ST candidates	Tripura Institute of Technology, Narsingarh, West Tripura
8	Mechanical Engineering	01	-do-	-do-

Last date for issue and submission of complete application form is from 9th - 14th July, 2024.
(Er. Vipulhoulhoungu)
Director.

**GOVERNMENT OF NAGALAND
DIRECTORATE OF TECHNICAL EDUCATION
NAGALAND, KOHIMA**

NO. DTE/ ESTT-2/02/2023-24/ /Dt. Kohima, the th July, 2024

NOTIFICATION

This is to inform all the intending candidates of CUET-UG-2024, that the last date for submission of CUET-UG 2024 forms is hereby extended till 7th days w.e.f. the date of result declaration by the National Testing Agency (NTA)

(Er. VIPULHOU LHOUGU)
Director.

SANGDONGER

Tanü, 6th July 2024 anogo Dimapur nung, Lt. Aotoshi Ozukum nungi jakzükba chirnur, semchir, anük-apang aser kidang kimang mensem ka mena Mr. Tianuken atema ken-o jembia lemtetba iba sangdong ajanga ajak nem osang metetdaksür :

- 1. Lt. Aotoshi Ozukum nungi jakzükba chirnur, semchir, anük-apang aser kidang kimangi Mr. Chubasowa Ozukum-i pa molungka agi dang Mr. Tianuken par chir ka ama kümdaktsübaji memolunger aser Lt. Aotoshi Ozukum aser Lt. Supongnaro na senmanger ka asutsü magizüker.
2. Mr. Tianuken-i konang nungsang/ tenung menük/ sentüsü kar danga bener arura, aji Lt. Aotoshi Ozukum chirnur, semchir aser anük-apang khuret masütsü saka Mr. Chubasowa Ozukum pa kija khuret asütsü.

Tanü 6th July 2024 anogo iba mensem nung dena aser iba sangdong kuli asürtem:

- 1. Mr. C. Apong Ozukum
2. Mr. C. Yanger Ozukum
3. Mr. Tongpangyongdang Ozukum
4. Mr. Imrongsashi Ozukum
5. Mr. Toshiyanger Ozukum
6. Mr. Imnasashi Ozukum
7. Mr. Bendangrenba Ozukum
8. Mr. Takoyapang Ozukum
9. Mr. Chubasowa Ozukum
10. Mr. Pangyangtemsü Ozukum
11. Mr. S. Maongtemsü Ozukum
12. Mr. Sentitoshi Ozukum
13. Mr. Tongpangwapang Ozukum
14. Mr. Tarepliba Aier
15. Mr. Takasashi Walling
16. Mr. Nokensashi Aier
17. Mr. Merenwati Aier
18. Mr. Wapongtemsü Jamir
19. Mr. Tianuken

Hungary PM Orban-i China Tir Xi den ajurutep

Beijing, Chiteni/July 9 (Agencies): Hungary Ato kilonser Viktor Orban tang Bejing semdangba mapang ka lir aser pa den sensaksemba mapang China tir Xi Jinping-i linüktem dang Russia aser Ukraine na indang indanga sensaksemtsü atema tenzükshitsü asoshi teyari agütsütsü mepeshia liasü. Orban ya tang yimjung asoshi inyaksangshiba mapang ka lir. Xi aser Orban na Mongolbarnü China yimtiba nung ajurutepogo. Hungary nung lenir yagi taoba hopta Russia aser Ukraine na semdanga linük ana tsüngda küm asembuba mangatettep adoker aliba yimjung nung bentettsü atema sensaksemogo.

Hungary iba ita European Union tir kümogo aser iba mapa agizüba sülen Orban-i yimjung ososhi inyak tenzükogo, ajisüaka iba inyakyim ya Europe nung aliba tanga linüktemi kangabo pumasemer.

"Russia aser Ukraine na rara nung yimjung asoshi lenmang lapoktsütsü atema China ya tongtibang tashi ka lir. Ibayongji ni tir Xi den pai Budapest semdangba sülen ita ana dang lir Beijing nung ajurutepogo," ta Orban X nung zülutsü.

Europe nung aliba lenirtem ajak rongnung Orban ya Xi aser Puti na den tesendaktep tajung lir. Pai taoba hopta Moscow semdangba sülen Ukraine aser EU ketdangsürtemi pa aitsüogo aser ashiba agi, Orban ya European bloc ajak tenung nung inyaksangshir masü.

Parnoki aijaka iba ajanga Bejing semdangtsü atema Orban menokdangtet aser pai ashiba agi iba inyakyim ya "Peace mission 3.0" lir.

Orban den sensaksemba mapang Xi-i, Russia aser Ukraine na dang rara anentsü, aser tanga tongtibang linüktem dang sensaksemtsü atema lenmang lapoktsütsü ayongzükba liasü. Tongtibang

linüktem ajaki teka amteper inyak nungdang ceasefire benoktetsü, ta Xi-i ashiba state broadcaster CCTV sangdong ka ajanga metetdaksü.

"Takaratiba nung ceasefire benoka yimden yimsüsüba tsütsü ken o bentettsü atema telok ajak tejangraba lir," ta pai shisem.

Kasa mapang nung Orban-i, alima ajunga mepetmesü nung aliba mapang tensa süngjema kümdaktsütsü atema China dak tashi lir ta ashiba den, yimjung asoshi jenjang agiba atema parnok nem tenüngsang agüja liasü. China aser Brazil nati May ita yimjung atema onük trok benoka liasü.

China-i ashiba agi, iba mangatettep nung parnoki shinga pumasemer, ajisüaka inyakyim nungbo parnok Moscow pusema linük ana lenirtem mapangshia semdangteper aser sepaitem military drill tem ayongzükba agir.

Russia-i, iba mangatettep bentettsü atema pa jenjang jangjashitsütsü asoshi Orban-i merandangba atema pelaba lemsatep. Kasa mapang nung Ukraine tir Volodymyr Zelenskyy-i ashiba agi, Hungary lenir yagi mediator ka ama inyakangshi mesütettsü, kechiyong iba mapa ya alima nung tashitait linüktemi dang inyaktettsü.

"Alima nung linük aika lir asü? aikabo mali. US aser China nati inyaktettsü ta ni amanger. Ano EU ajungai inyaktettsü," ta Zelenskyy-i Poland semdangba mapang ashi.

Yimjung atema lenmang mesapoktsü atema tanga linüktemi tebilembatem benokba agizüktsü atema Ukraine-i mulunga lir, ajisüaka onüktem ya Ukraine taginüba den putepa aser talisa yimjung atema Ukraine-i onük 10 benoker aliba den puteptsüla, ta Zelenskyy-i ashi.

Ukraine-i yimjung atema onük kar benokba asadangshitsü atema taküm

küm ano international summit ka ayongzüktsü imla atadar. June ita senden amenba mapang China-ibo shilem magi, shirnok Russia den kanga junga sendaktepa lir.

Kasa mapang nung Orban-i Xi den ajurutepa sensaksemba atema United States-i süoki ia bilemba lemsatepogo. White House National Security Council otongdar John Kirby-i ashiba agi, Ukraine nung mepetmesü adoker aliba bentettsü atema merangba dak sendakba nung iba sensaksem ya kecha tajanzük mali ama bilemer aser iba ya tebilemtsü ka lir.

Orban lenisüba nung Hungary aser China na yimden yimsüsüba aser rongsenketzung nung tesendaktep tajung yangluogo. Ita ana tejakdang Xi-i Europe nung linük asem semdangba mapang Orban-i Xi agizükba sensaksemogo. Iba mapang Xi-i France aser Serbia na semdang, ajisüaka linük ana yabo EU aser NATO naprongla nung densema mali.

Hungry semdangba mapang China-i linük ana tesendaktep "all-weather, comprehensive strategic partnership,"-i ajungkettsüogo.

Hungary Ato Kilonser yagi Ukraine nem anüolen aliba linüktemi military teyari agütsüba anema aruogo aser EU-i Kyiv nem teyari agütsütsü atema jenjang agiba aser Moscow nem tenokdangba balala agütsüba anema liasü.

Iba inyakyim ajanga EU aser NATO nung Hungary den sendaktepa aliba linüktem tezüdangdakja liasü, kechiyong Russia-i Ukraine amakba ya international temzung ozüng nung aibelen ka aser Eastern Europe atema security dak sendakba nung amokmeren ka ta agizüktsü Hungary-i memulunger.

Maneni Orban Washington, DC-i aotsü kong NATO lenirtem Ukraine nem teyari agütsütsü atema sensak asemtsü.

Israel-i Gaza City amakdang nisung 50 shi tepset

Gaza City, Chiteni/July 09 (Agencies): Ceasefire atema jembishinü liaka Israel sepaitemi Gaza Strip north tsütsü asendenshir amak.

Tesüiba ghonda 24 tsüngta nisung 50 shi tepsetogo aser aika yirua lir, ta Gaza indang Ministry of Health ajanga Mongulbarnü ashi.

Israel tanks tem Gaza City districts telungi aita Shujayea, Sabra aser Tal al-Hawa tesemtem nunga kanga sashia khatepa liasü.

Hamas indang armed wings aser Palestinian Islamic Jihad ajanga ashiba agi, parnoki Tal al-Hawa nung Israel sepaitem den antitank rockets aser mortar amshia rara aser yangji asü-amartem liasü. Gaza City nung alirtemia southwest tsütsü amjang tepiyong ola tulu adoka apokba aser prangbong agi khatepa aser helicopter amshia amakba indang ashi.

Gaza City nung Hamas aser Palestinian Islamic Jihad fighter tem lir ta itdangiter temi sayur ta sangdongba sülen Israel army-i iba yimti nung temulung tali agütsür.

Gaza City nung alirtem dang Deir el-Balah leni aotsü shiogo, koba Gaza Strip tesem balala nungi Palestine nungertem adenshiba agi sünga lir ta United Nations-i ashir.

Rara tetenzüklen Israel-i Gaza north nung aliba civilian tem dang south leni aotsü ashi aser item tesem ya "safe zone"

ta sangdonga liasü saka mapang tatsüka lir yangjia amak.

Central Gaza kübok Nuseirat refugee camp nung aliba ki ka nung bomb apokba mapang nisung tenet asü, Gaza City north tsütsü al-Jalaa Street nung ki ka amakdang nisung trok asü aser anasa Lababida nung bomb ka pokloksüba nunga nisung asem asü.

Indonesian Hospital indang director Marwan al-Sultan-i ashiba agi, parnoki al-Ahli Hospital nungi shiranger aser yirur alir nisung 80 agizükogo. Gaza indang mozüki ajunga shiranger aser yirur alirtem agi sünga lir, aser Israel-i tanen makai amakba aser supplies peria maliba ajanga operation junga mesüteter.

"Nisung aika tangsa surgery agitsü nungdaker. Aika tekolak nung khar intensive care nungdaker. Totzü aser medical supplies tatemer," ta pai ashi.

Israel indang army temi Mongulbarnü sangdong ka nung ashiba agi, par sepaitemi Gaza City nung operation agiba mapang kiralongrar aika tepset aser nok-nü jenti ngutet.

Par sepaitemi Shujayea neighbourhood nung ali temalen aser telunglen maneni meita aor, ta ashi.

October 7 nü nungi tenzükba Israel-i Gaza amakdang nisung 38,243 shi tepsetogo aser 88,033 yirua lir, ta Gaza indang Health Ministry ajanga ashir.

Ukraine amakba atema Biden-i Russia aitsü

Washington, Chiteni/July 09 (Agencies): Russia-i missile khaloktsüba ajanga Ukraine nung nisung 38 asüba sülen US Tir Joe Biden-i aitsü aser Kyiv indang air defences tashi itshitsütsü nangzük.

Hombarnü linük tesem balala nung nisung 190 shi yiru aser item rongnung linük yimtiba Kyiv nung aliba tila tanur indang mozüki nunga yirurtem liasü.

Russia-i Kyiv mozüki nung makha ta ashir, saka mozüki nung bomb apokba ya Moscow mapa asütsü ta UN-i ashir.

Biden-i Mongulbarnü Washinton nung NATO senden ya ayongzüktsü renemshiba mapang iba osang ya arua liasü.

Iba senden nung Ukraine indang air defences tashi tali itshitsütsü atema jembir sangdongtsü, ta US tiri ashi.

NATO züngsem linük 32 nungi lenirtem, parnok den kasa ama tembar linüktem aser EU ketdangsürtem iba bloc küm 75 ajungba bilemtettsü adenshir. Ukraine Tir Volodymyr Zelensky iba sentong nung adentsü imlar.

Pai anüolen linüktem dang air defences tali agütsütsü ita aika ajungshia arur. Küm ka jungnüa tsüngta civilian asoshi May ita ya tamajungtiba liasü, ta UN ketdangsür temi ashir.

Iba NATO senden nungya

Russia-i Ukraine amakba nung defence dak rangloker jembishinü akatsü.

Ukraine ya NATO züngsem masü saka Russia den rara atemba den külemi akok tashi tekeraba nung anioksü asüngdanga lir.

NATO secretary general menden nungi alutsü alisang Jens Stoltenberg-i Ukraine züngsem akumtsüba ya paidoktsü makok saka rara matem tashibo tamakoktsü, ta shia liasü.

NATO nung Ukraine adentsüba ya Russia-i khenyongi memulunger aser iba ya ajanga NATO sepaitem par litsü tsütsü tali anasai arutsü tsübor.

"Russia-i amakba nungi yimtitem aser civilian tem kumzükba ayuba nung yaritsü atema Ukraine indang air defences tashi itshitsü asoshi onoki mera tasen sangdongtsü," ta Biden-i ashi.

"Asenoki Ukraine yariba anokshitsütsü makok ta jangjatsü atema ni Tir Zelensky ajurutsü."

Ukraine-i mebishiba ama UN Security Council senden ka Mongulbarnü amener.

Russia-i missile amshia Ukraine amakba atema UN Secretary General Antonio Guterres-ia aitsüogo.

Paris Olympics nung Gagan Narang Chef de Mission asütsü



Chiteni/July 9, 2024 (Agencies): Olympian aser 2012 Olympic Games men's 10m Air Rifle bronze medalist Gagan Narang, MC Mary Kom melenä Paris 2024 Olympic Games nung Indian contingent Chef-de-Mission asütsü shimogo. Olympics ya July 26 nü tenzüksü.

Indian Olympic Association President Dr PT Usha-i Mongolbarnü ashiba agi, arishi küm41 tain Mary Kom-i mapa toktsüba sülen ajaki Narang Deputy Chef-de-Mission aliba nungi Chef-de-Mission kümduksütsü mulunga liasü.

Mary Kom, shibai 2012 Olympics nung bronze medalist

ka ngua liasü, lai 2024 küm April ita jurila maparen kar aliba ajanga iba mapa tokja liasü.

Chef-de-Mission shilem ya kanga tongtibang lir, kechiyong iba nisungba ya Olympics matong tsungda team atema otongdar asütsü, kong asayartem, management aser Mission Team den seminar balala nung shilem agitsü aliba densema lir.

Asayamung mapang mangatettep mesüra mepetmesü kar dang adokra ken o bentettsü aser diplomatic stance ka agitsü atema Chef de Mission mapa asütsü. Parnokisa Olympics inyakyim

shidak benoka minyakba ken o tem bentettsü atema tongtibang shilem agitsü.

Kasa mapang nung IOA tira isa India tsürtem rongnungi nungtugu badminton asayar aser Olympics nung medal ana tashi ngur alila PV Sindhu aser Table Tennis asayar, A Sharath Kamal na linük wako abener asütsü shimogo.

Paris 2024 Olympics ya July 26 nü tenzüksü renema lir aser August 11 nü tembangtsü. Iba asayamung ajanga linük nem konang tetushi bener arutsütsü aser alima nung sabang tulutiba nung India nung asayartem sayatsü atema India team renemdar.

Bellamy Wales manager kümogo



Chiteni/July 9, 2024 (Agencies): Küm pezü atema tenangzüktepba yangluba sülen Craig Bellamy Wales manager kümogo. Pa 2028 küm tashi inyaktsü.

Arishi küm 44 tain Bellamy-i taoba mapang külem team-mate Robert Page melenogo, shiba June ita mapa nungi anenja liasü.

Cardiff nung asosang Bellamy shiba Wales team nungi 78 ben asayaogo pa ya 2007-2010 tashi Wales captain liasü.

"Linük team len anitsü atema maongka agütsüba atema kanga pelar aser iba ya kü indang career nung ajak dang

nungi kanga dang nema adangba mapang ka lir," ta Bellamy-i ashi.

"Cymru head coach akümtsü kü nükjidong liasü aser ni iba mapa atema renema lir.

"Iba team terenlok atema ni bendanga agüja inyaktsü aser Welsh football nem takok bener arutsütsü atema ni tejangraba tulu lir. September ita Nations League nung asayatsü matateter," ta pai ashi.

Burnley nung acting head coach mapa toktsüba sülen Bellamy-i iba mapa agizükogo. Taoba ita Scott Parker shimba sülen Bellamy-i Burnley acting head coach mapa tokja liasü.

Bellamy den inyaktsü atema Parker tejangraba liasü saka Burnley mendenbuba Alan Pace-i ashiba agi, club dak sendaka alir ajaki temaotsü agütsür Bellamy club toktsüogo.

"Burnley nung inyakba mapang kanga meranga inyakba atema ni Craig dang kanga pelar aser Wales manager ama mapa tasen agizüker inyakba mapang takok ngua aotsü imlaja atar," ta Pace-i ashi.

Wales team nungi asayaba mapang Bellamy-i goal 19

idakja liasü, kong 2002 küm Italy akokba asaya nung goal idaktsüba densema lir.

Iba mapa atema Arsenal nungi taoba mapang nungtugu asayar Thierry Henry, Georgia caoch Willy Sagnol aser Oxford United coach Des Buckingham nung den iba mapa atema jembishinüogo saka Football Association of Wales (FAW's) atema bellamy ya mezüngbuba liasü.

Wales manager ama pa mezüngbuba asaya Nations League nung September 6 nü Turkey den asayatsü aser iba sülen September 9 nü Montenegro den asayatsü.

Bellamy international football asaya nungi 2013 küm anen, ajisüaka pa asayamung tongtibang ka nung dang shilem magitet, kechiyong Wales pur Chris Coleman kübok 2016 kümang Euro atema qualify süa liasü.

Pa mezüng Cardiff City indang academy nung coach mapa inyak aser iba sülen Anderlecht nung taoba mapang Manchester City team-mate Vincent Kompany kübok assistant manager inyak aser Burnley nung inyaka liasü.

Sri Lanka den Rohit, Virat aser Bumrah masayatsü

Chiteni/July 9, 2024 (Agencies): Iba ita tatemlen Sri Lanka den oa asayatsü aliba asayamung nung Rohit Sharma, Virat Kohli aser Jasprit Bumrah nung asayatsü.

Indian cricket board-i, T20 World Cup akokba team captain den asayar tejen ana ya September ita Bangladesh den masaya tsungda anisungzüksü atema maongka agütsüogo. India aser Bangladesh na September 19 nungi tenzüka Test ana aser T20I asem asayatsü lir.

India team Sri Lanka nung oa July 27 nungi August 7 tashi ODI asem aser T20I asem asayatsü. Tawa tembangba T20I World Cup tembangba sülen Sharma aser Kohli na T20I asaya nungi anenogo aser kasa mapang nung Bumrah-i pa bo iba format nung linük tenüng nungi maneni asayatsü ta shiogo. Osang ajanga ashiba agi, iba asayamung atema asayartem shimtsü asoshi selection committee taruba hopta ajuruteptsü.

Bangladesh den asayaba


sülen India team Kidang October 16 nungi November 5 tashi New Zealand den Test asem asayatsü. Iba sülen India team South Africa-ia oa November 8 nungi 15 tashi T20I pezü asayatsü aser November 22 nü nungi Australia den Test pongu asayatsü.

Kasa mapang nung Indian board-i team indang support staff atema yakta applicant tem jaoktsü, kechiyong batting coach Vikram Rathour, bowling coach Paras Mhambrey aser fielding coach T Dilip nung USA aser West Indies na nung T20 World Cup asayaba sülen parnok contract tembangogo.

Board indang Cricket Advisory Committee (CAC)-i head coach mapa atema Gautam Gambir aser WV Raman na interview agiogo. Gambhir head coach akümtsü imlar aser official sangdong ka atema dang atadar.

BCCI secretary Jay Shah-i ashiba agi, coach tasenba lenisüba nung India team Sri Lanka nung oa asayatsü.

PCB-i Kirsten & Gillespie na nem sadem sadema inyaktsü temelaba agütsü



Gary Kirsten

coach anaprongla dak kanga temulung alemba lemsatepogo aser cricket board-i tena nongita yaritsü ta tenangzüka agütsüogo.

Pakistan team head coach ana yagi, temang kanga fit aliba asayartem dang national team atema shimtsü asoshi guideline tejangja ka nungdaker ta metetdakja liasü.

"Team jenjang melenshitsü atema kechisa nungdaker ajak inyaktsü atema Naqvi-i tena nem temelaba agütsüogo aser shingai tena dang asayar shimba mesüra asayartem fitness dak sendakba nung kecha masüngdangtsü, ta Naqvi-i shiogo," ta source-i ashi.

USA aser India na den asaya maokokba sülen Kirsten-i team nung asayar tejentem dang parnok game awareness ajungketshitsü aser tasa tasen angazüksü mesüra team nung manioktsü ta shiogo.

Naqvi nem agütsüba report nung senior team manager Wahab Riaz-i, World Cup asayaba mapang team yongtsü nung asayartem tsungda mangatettep adoka liasü, ta ashi.

Iba senden nung assistant coach Azhar Mahmood aser tanga ketdangsurtemia shilem agia liasü.

PCB-i ashiba agi, Naqvi-i

BILEMDANGANG

"Memerangdangi toktsüba ya tashimait tulutiba rongnung ka lir."